

1. Óosana kúradoo aukuanna Ánutufa sia marú ainainannai innaarúna faqa maqá faqa óosana arasée áuqinau.
2. Miaukuanna maamaqáfa fífau dumúna nammari márídanoo, fífau fáafauinoo márídanoo asukuna firaafa nammári rafáaqafinoo marídanoo Ánutuna maraquna fannoo nammári ámuuqumau úfaira foora úqinau.
3. Miaukuanna Ánutufa qinau, káaqa qárana máriannee qufanoo káaqa qárafa káaqa qanau.
4. Káaqa qámafufanoo qáfamaseenoo ámiqimambinoo qímaseenoo káaqa qárana faqa asukuna faqa áadu áadu rakéema quqánu.
5. Rakéema quqáseenoo qáfamaseenoo Ánutufa káaqa qáranara fáasaanee qinau, asukunara eendákifée qinau. Miqí qímasoofanoo mikari indaarú óosana aróo faasaanna asukuna faqa iáqarana faqa quqá-qoofa márídanoo.
6. Miná ínaaqiana faasaana Ánutufa kaifáa qinau. Innaarúnai qáindara foora rusína márínanoo nammári mirínni faqa mianni faqa rainánoo márianifeera qinau.
7. Miqí qímaseenoo Ánutufa innaarúnai qáindara foora áuqufufanoo nammári rainá mirínni faqa

- maqai faqa quqánau. Quqássoofanoo dóo miqínoo máridanoo.
8. Ánutufa miinnaarunaqaindána áuqureenoo innaarúnee qinau. Miinaaqiana faasaanaa asukuna faqa iáqarana faqa aniranau.
9. Qaaramoo fáasaanaikufanoo Ánutufa kaifáa qinau. Maqásaanammari suqúfinoo moodáanaki mandifinanoo maqá koorooianifeera qímasoo-fanoo miqímminoo márinau.
10. Ánutufa aadánaikunara maqá fee qínoo áuquranau. Nammári moodáanaki suqúnara ooruku námari fee qínoo áuquranau.
11. Miqí qímaseenoo dóo andeeqáfiifoo qímaseenoo fúka máqasaara qinau. Ándanda óosana óosana kambíqaani, óosana óosana ándanda áadu áadu ándanda narí qaqamma minakí márinafa kambiqáanoo, óosana óosana qaqamma íreemari-saqarifa narí qaqamma minakí márinafa kambiqáanee qufanoo miqímminau.
12. Maqá fannoo ándanda maqánau, óosana óosana ándanda narí qaqamma minakí maruna maqá fannoo maqánau, qaqamma íreemarusaqarina narí qaqamma minakí máruna mina faqa maqanau. Narí óosana narí óosana kai maqánau. Maqasoofanoo Ánutufa aikuqumaseenoo dóo ámiqimminoo qinau.

13. Miqímasoofanoo miqaaramoofaasaanna miná asukuna faqa iáqarafa faqa aniranau.
14. Qaara faqa qaara faqa faasaanaikufanoo Ánutufa kaifáa qinau. Innaarúnai qóoma óosana óosana kambíqaani súani faqa quqoona faqa fásau faqa fáasaana faqa eendáki faqa raináanifeera, aukúana aukúana óosirana uqannífiqaanifeera, innaarúna qáindasaaqari maqásaa
15. faqa káaqa qáanifeera. Miqí qímasoofanoo miqímminau.
16. Miqí qímaseenoo Ánutufa firaqoomatiaqara súani faqa quqoonafaqa miqanda quqánau. Firaqooma súaniara anée fáasaana rakísinnimaqaannee qinau. Óoreeqarana quqoonara anée eendáki rakísinnimaqaannee qinau. Fásau namufaqa minamusa faqa áuqu quqánau.
17. Ánutufa miqoomanamusa innaarúna qáindasaa quqáseenoo maqásaa káaqa qáidanoo eendáki faqa fáasaana faqa rakísidanoo asukuna faqa káaqa qárana faqa raináanifeera quqánau. Ánutufa quqáseenoo aikuqumaseenoo dóo ámiqimmbiifoo qinau.
19. Qímasoofanoo qaara faqa qaara faqaikufaasannasaa asukuna faqa iáqarana faqa aniranau.
20. Moodáanaiqisaukunamu faasaanasaa Ánutufa

qinau. Aiqáma nammárikiki noodaana aandau óosana óosana moómoo kambíqaani, innaarúna qáinda ámeemaanai ufiniuqa faqa qaqamáree nuaqa.

21. Miqí qímaseenoo Ánutufa nammárikina firaa-aandau faqa káqikaa noodaana aandau óosana óosana faqa moómoo uqanna áuqu quqánau. Níqoosa faqaasa ufiniuqa narí óosana narí óosana misá faqa áuqu quqánau. Áuqu quqáseenoo aikuqumaseenoo ámiqimmiifoo qinau.
22. Miqí qímaseenoo Ánutufa narí afaaqóoqa qímannimageenoo qinau. Asumu moómoo kambíqafiqa máriiqa ooruku námmarikinana ainaina faqa moómoo kambíqafi máriaqa ufiniuqa faqa moómoo kambíqafina maqásaa máriaqa.
23. Qímasoofanoo moodáanai qísaukunamu fáasaana asukuna faqa iáqarana faqa áiqaranau.
24. Áiqarroofanoo dínni taikásee dínni onu moodáa marasee fáasaanasaa Ánutufa qinau. Maqa fannoo moó óosana moó óosana áanna faqaa ainaina maqáani. Firinée mária ainaina faqa maqámau ámuquundari nímaria ainainausa faqa óosana óosana aiqáma káasauainaina faqa aiqáma narí óosana narí óosana maqá fannoo maqáani.

25. Miqí qímaseenoo Ánutufa káasauainaina faqa kooqíkiainaina faqa amuaquundari maqámau nímariaainaina faqa aiqáma narí óosana narí óosana áuqu quqánau. Áuqu quqáseenoo aikuqumaseenoo dóo ámiqimmiifoo qinau.
26. Miqí qímaseenoo Ánutufa qinau. Maasá faíqi áuquanaura, maasá qimana kái maasá qeeqá fooqáana áuquanaura. Mifasiqáfa ooruku námmarikinoodaannaainaina faqa sandáaqai qaqamáree nímaria ufinisa faqa kooqíkimaria-aandausa faqa káasauaandauaina faqa ámuquundari maqámau nímarina faqa mifá rakísiani-feera áuquanaura.
27. Miqí qímaseenoo Ánutufa faíqi narí amana kái áuqinau. Ákee faqaana faqa áfaamu faqaana faqa áuqinau.
28. Áuquseenoo Ánutufa nifaaqóoqa qínoo qinau. Ínniqara asumu moómoo kambíqafinoo maamaqamaqanaki qumbíqafiqa rakísiaqa oorukunammárikinoodaanna faqa ufiniuqa faqa aiqámaainainatia maqámau máriasasaa faqa rakísiaqa.
29. Ánutufa kaifáa qínoo qinau. Ínni nárana aiqáma maqamaaqaki kambíqeemarina qaqamma íreemari-andanda faqa aiqámasaqari qaqamma íreemarina asumunamufaqa ínni nímidaga naaqeera.

30. Káasauainaina faqa ufiniuqa faqa qaqamáree
nímariasa faqa nímuaqundari maqámau
nímariasa faqa aiqáma náanna faqaasa faqa
aiqáma saqáriamaneeariraandanda ínni nárana
nímidaqa miná naaqeera. Miqí qímaseenoo
miqímminoo márínau. Dóo Ánutufa miaiainausa
qáfamasoofanoo ámiqiuqannamminau.
31. Dínni taikásee dínni oonu moodáa marasee
faasaana miná asukuna faqa iáqarana faqa
áiqaqoofanoo taikánau.

Oosana Aroo UfafaFiraa Kamu 2

1. Miqímaseeno innaarúna faqa maqá faqa
taikánau. Miqóo aiqámaainainafiraatia-
uqanna márufa mifá taikánau.
2. Dínni taikásee dínni oonu moodáa marasee
faasaana Ánutufa narí kadáapirida áuqimar-
ufa taikánau. Dínni oonu qaara máreenoo
narí aináinimaruna quqánau.
3. Dínni taikásee dínni oonu qaaraqanda-
faasaanara Ánutufa nifaaqóoqa qinau,
náaquqara faasaanee qinau. Narí indaarú
áugeeuainainnara mifá taikóofaasaannara
náaquqara faasaanee qinau.

4. Maaufana indaarú sía marú ainainannai innaarúna
faqa maqá faqa áuqufa miufafa dóo miqímminoo
máridanoo.
5. Indaarú karaambáiqá Ánutufa maqá faqa
innaarúna faqa áuqu aukuanna sía Ánutufa
aakú maqásaa quqánau. Minára káasauandanda
faqa saqári faqa sía kambíqanoo márínau.
Faiqi maqá indufírafa faqa sia márínau.
6. Mikamuqoo nammári áidoofanno maqákiqari
ururéeno aiqámamaqamaaqa uqeená amaqánau.
7. Mikari karaambáiqá Ánutufa maqásaa qaraa
kookooma qumáreenoo atakúsee faiqí áuquseenoo
narí márira áanna aikáamaraki fuaqásoofanoo
maa mária fasiqausa nimana faqáasa kambíqaqau.
8. Mifasannai Ánutufa súaniafu óosanai Éedeena
maqamaaqaki kadiqa firaanaki qúmaqusoofanoo
íroofanoo narí áuquqoofasiqana minaki quqánau.
9. Karaambáiqá Ánutufa óosana aróonara saqári
moómoo óosana óosana mikadidanaki kambíqaqau.
Ámiqirasaqari qaqamma néemaru saqárisa moómoo
kambíqaqau. Misá aiqáma ámiqimasee qáfee-
marusa kái kambíqaqau. Kadiqa qámbaanai
saqári qaaraqanda kambíqaqau. Moósaqari náma-
sainafa sía kúquannoo náaru náaru máriannoo.
Minára misaqarina áuqu náaru náarumarira-

- saqarifee qinau. Saqári moó námasainafa mifá rainára óosana írirafa kambíqaannoo. Misararinaqaqamma námasainafa aiqámainainara ámiqirafa kai fee qímariafa taikáanifeera. Akaqaainainara ámiqirafee qinoo akaqaainainara mandáinainee qíanifeera márinau. Minára misararina áuqu ámiqiranara faqa mandáinainara faqa íriraqeesaqari fee qinau.
10. Nammári moó fannoo Éedeena maqamaaqakiqari qumureenoo kadiqa qámbaana qumuréenoo maqa uqeená uqeená íanifeera qúmiqareenoo qaara faqa qaara faqa námmarikufanoo óoqufinau.
11. Moónammari áuqu Písoonanammari mifá Qafiraa máqamaaqa átindannai qumifinau. Miqóo kóora máridanoo, mimaqannaa kóora ámiqirakoora máridanoo, makáqa anoona fooqáafa mifá faqa miqóo máridanoo, firaafeefauru áqimariaoonifa miqóo máridanoo.
13. Moónammari áuqu Kíqoonanammari qúmi márinau. Mifá Kusa máqamaaqa átindannai qúmifi márinau.
14. Moónammari áuqu Tíkarisi márinau. Mifá Asuraa máqamaaqa súani óosana qáannai átindannai qúmi márinau. Ínaaqianna nammari áuqu Eeufarateesa námmaryi márinau.
15. Karaambaíqa Ánutufa narí áuquqoo fasiqana mara

- máreenoo Éedeena kadidakina quqánau. Kadidaki maqa indufídanoo aiqáma ainainasaa mikadidanki rakísianifeera.
16. Ánutufa quqáseenoo mifasiqana maaqí qímaseenoo aakápanau. Anée kadidakina aiqáma saqari qaamma diqísee náa.
17. Moodáa saqáriarakai qinee qáoo qídaqa. Írirana ruqíqee mari saqarifa máridanoo, yáireefee anee námaseenana mikari kai kúqinnaranoo.
18. Mifasannai karaambaíqa Ánutufa mifasiqanara qinau, maafasiqafa naríaraa márifanoo síamma andeeqánoo máridanoo, qinée miná aqoónnana miná dadaaqíaninnana áuqusee ámianaura.
19. Ánutufa maqa qumáreenoo atakúseenoo óosana óosana aandáu ainaina faqa aiqáma qaqaamáree nímaru ufinisa faqa áuqinau. Áuquseenoo aiqáma náarammeeqeenoo faíqi máruqoo núquraanifeera quqásoofanoo nána ainainee áuqur-oofa dóo minnuquna faqaasa máriqau.
20. Míqimaseenoo faíqi fannoo kooqíki maru ainainnausa faqa káasau ainainnausa faqa innaarúnnai qaqaamáree nímaru ufinisa faqa núquramma quqáqoofa. Miqíqa márufanoo Ánutufa mifasiqana aqoónnanaikiranara randéenoo sía paqúrinau.

21. Minára faiqárana faíqi áminau. Faiufanoo Ánutufa miná áqaasana moodáa tátuseenoo miná amaqínnai minaki ititánau. Ititáseenoo karaambáiqua Ánutufa miná áqaasana quqáseenoo minánnai ánaasee áuqináu. Áuquseenoo faíqi máruqoo áfiqa múnusoofanoo faíqi fannoo asasamaseenoo qináu.
22. Dóo maqee uqanna maafa qinée únnaqoo anireenoo, ámudaani qiní qímudaanikinaafa, amiqi qiní qimaqínnai áuqirafa, qinée minára ánaasee áuquraanaura, maafa faíqikinaafa márifa máridanoo.
24. Minarakai aiqáma fasiqauqa nári nínausa níkausa minníseeqa nári nináaqmaaka faqa qapámambiqa moodáa nímaqi nimudaani kammafi maridaqa sía amana rakéeifaranoo.
25. Mifasiqafa narí ánaaqandiri káqisamu máruqanda máriqau sía naríara naríara nisaurí máriqau.

Oosana Aroo UfafaFiraa Kamu 3

1. Karaambáiqua Ánutufa káasau ainaina áuquqoona qámbaanakiqari sakáni mifa írirana fíqararafa márufa marináu. Mifá ánaasee unnai anireenoo

- irámmirinoo qináu. Kúqaa fee Ánutufa saqá-riugaki aiqáma qáoo qínoofee sía naaqee qínoofee.
2. Mianaaseefa minára iriseenoo qímamináu. Eeóo aiqáma naaqee qifaqa náidaqa, kadiqa qámbaanai
3. moodáa mina sía náidaqa qáoo qinoo sía áuqaaqee sía naaqee qinoo námasee kúqifaranoo qifaqa sía náidaqa.
4. Sakáni mina ufa iriseenoo ánaasee qímaminoo qináu.
5. Námasee sía kuqínnara, Ánutufa minara íridanoo. Yákariffee mina námasainanoo ínni nifusaa írirafa aniraannoo. Ruqíqafinoo ínnee Ánutufara foora máfifanoo mandáinainara faqa ámiqirainainara faqa náaqooki írifara.
6. Ánaasee sakáni ufa iriseenoo áfu qáfamasoo-fanoo ámiqirafa márufanoo nárana faqa qáfoofanoo idaaqírafa márufanoo íriranara faqa írufanoo ámiqufanoo akaqána diqíseenoo néenoo nari afaaqi faqa márufanoo múnu ámufanoo nanau.
7. Miqanda námasoofanoo miqoo nífusaa irirafa kambíqoofaqa narí afaaqa qáfamasee narí afaaqa qáfamasee káqisamu fee qímaseeqa nisaurúseeqa saqári ámanee didíqi ámanee

fooqáana qumáree akunúseeqa nári nifaaqasaa ititáqau.

8. Eenóofanoo kadidaki asooaa asooaa ímarufanoo Karaambáiqá Ánutufa kadidai nímarufaqa faíqi faqa ánaasee faqa íriqara saqári atukaki nisaurúsee kukéeqaqau.
9. Karaambáiqá Ánutufa faíqi áaramasee anée yáifée qufanoo mifa qinau.
10. Anée kadidai núanaqa qinée iriseeqa káqisamu máriunausa rufiaseeqa saqári atukaki kukéeqeeqa.
11. Miqí qufanoo Ánutufa qinau, yáfee káqisamuara aní aamúaqinoofee. Anée saqári qaqama qinée qáoo qúnnana néeneeanafee.
12. Faíqi iriseenoo qímaminoo qinau. Maaanaaseefa qiní faqa márifa anée qímunafa mifa míni qímifaqa néeqa.
13. Miqoo karaambáiqá Ánutufa mianaaseena irámmirinoo qinau. Anée nána ainainee ínane maaqinane. Mianaaseefa iriseenoo qinau. Sakáni fannoo anireenoo qiní qímanamasai faqa néeqa.
14. Karaambáiqá Ánutufa mina iriseenoo quándafinoo misakánina afaaqóoqa qínoo qinau. Anée maaanaaseena ueeqáananara mina ákiqara kooqíkináa

aandau faqa, káasau aandau faqa misa níqurararana nímiánaura aníndi faqa firaana ámiánauranoo. Anée maqámau ámuqaundari rarisana nídana kookoomara foora fífau ainaina náidana kúqiranaki taikáa.

15. Ánaasee faqa aní faqa qinee namuqáakammannisaanauranoo, aní asumu faqa mina asumu faqa namuqáa kammannisaanauranoo. Miná asumukiqari moodáa fannoo aní ákiaqa radámuannoo. Anée mina asumukinaana áiku atáa ukáqaminnaanoo.
16. Ánutufa miqí qímaseenoo sakáni áquraraseenoo quándakufanoo miánaaseena maaqi qímasee áquraranau. Anee faíqi máqainaqa kadáa-pirirana faqa aupúrarana faqa ámiánauranoo. Maaqooqari aupúrarana aneena faiqinamu maqéinnaranoo. Aní aundura fannoo aneena afaaqiara rída márinnaranoo. Aní afaaqi fannoo aní úriaaqararafa anée miná úreqarafa márinnaranoo.
17. Miqí qímaseenoo Ánutufa quándafinoo mifasiqana faqa áquraranau. Anée áneena anaqa ufa iriseena qiní qáooqira saqari qaqama náannanara minara qinee máa maqee aqisaanana maaqooqari miqíkai ina fúa. Anée kadáapiridana árirana rakéeidana maa-

maqanaki úmmaqusee náidamaría.

Máridana kadáapirina fífiinana kúqinnana kai taikáa.

18. Áaruqira ainainna faqa amuka faqáa ainaina faqa maqákiqari kambíqamaqaanoo.
Maqákinna ainaina faqa káasau ainainna faqa neennaranoo.
19. Aní áfaaqai tooqaamu árimarinana nárana náa.
Miqína fífiinana maqáikamafinana taikáa.
Aní maqánnai áuquqaafanafa márianafa máriananoo.
Anée maqa máriananoo kaifáa maqáikamafinnaranoo.
20. Dóo miqí qímaseenoo Ánutufa áqiraufa faíqi qímaminau. Faíqi fanno narí ánaaqara maqásaa qáaraa fasiqa anaasee ninoofee qímaseenoo áuqu Éewa qinau.
21. Karaambáiqá Ánutufa aandáu apata qumáreenoo minánnai qamunnara foora áuqeeqeenoo Ádana faqa narí ánaaqá faqa níminau.
22. Ánutufa nimiseenoo faíqiara qinau. Dóo maafasiqafa maasara fooqaanamafinoo írirana ruqíarafa máridanoo magee mifasiqafa ásauku uqéereseenoo saqári moó káqi marira saqari qaqama diqíseenoo námaseenoo náaruara káqi máriandoora.

23. Karaambáiqá Ánutufa minára iriseenoo Éedeena kadidakiqari dóo miqanda nífaqeeqeenoo aní áuquafanna ainaina kaifáa indufídana tooqaamu árimarinana paqúrimaseenana nárana náa.
24. Faíqi áfaqaseenoo Ánutufa seerubima ángiroo-uqa quqásooafa. Káqi marira saqari atukai fímaría aana kindooranaki ititáqau. Ánutufa idáuruara foora daroodaraa ímaruna mina faqa dóo miqóo mikadidanaki quqásoofanoo minasaa faqa ititáqau.